

HEADLINES (EVENING)

1. Larsap, Gen (Retd) Vijay Kumar Singh an Mizoramin leilung mawina leh hnam zia rang a malsawmna a dawn humhalh kawngah, mi tin an pawimawh a ti.
2. Zoram Drivers' Union (ZDU) buatsaihin Road Safety Week vawi 44-na - Fimkhurna Hapta hman tan a ni.
3. Prime Minister Narendra Modia chuan vawiin khan Shri Ram Janmbhoomi Temple Ayodhya ah dharma dhwaja flag a pawtpharh
4. Labour Code thar chuan ramchhung eibar zawinnaah hna thar nuai 77 chuang a siam belh dawn niin SBI chuan a sawi.

<><><>

GOVERNOR

Larsap, Gen (Retd) Vijay Kumar Singh an Mizoramin leilung mawina leh hnam zia rang a malsawmna a dawn humhalh kawngah, mi tin an pawimawh a ti.

He thu hi vawiina Raj Bhavan-a Mizoram Bharat Scouts and Guide-a tel zirlai thenkhat, Rajya Puraskar chawimawina a hlanna ah sawiin, Larsap chuan hemi huna kalkhawmte chu Mizoram thing leh mau bakah lui leh nungchate humhalh kawngah theihtawp chhuah zel tur a sawmin, khawtlang nun hrisel tak vawn nun zel chu mitin te tih makmawh a nih thu a sawi a, he huna zirlai chawimawina dawngte chu an thiamna leh theihna ram leh khawtlang tana hmang tangkai tur leh Scout and Guide huamchhungah pawh an chawimawina dawn chu duh tawk mai lova, India ram pum huap chawimawina India President hnen atanga dawng ngei tura a duhsak thu a sawi bawk.

Vawiina Bharat Scout and Guide state award sang ber, Rajya Puraskar hi mi 97-in an dawng a, he award dawngtute zinga Aizawl district pawn a awm te chuan anmahni district theuhvah chawimawina hi an dawng thung a ni.

<><><>

FLORIST FAIR

Horticulture Minister Pu C. Lalsawivunga chuan, Mizoram a pangpar khawitute dinhmun chawi kan nan Indo Dutch Center of Excellence for flower-te nena thawk ho tura hmalak mek a nih thu a sawi.

He thu hi vawiina Aijal Club Park-a Mizoram Florist Association-ten, an pangpar khawi pho lanna hun an neihah sawiin, Horticulure Minister chuan pangpar khawi atangin khawvel ram changkang zawkte chu dinhmun sang takah an invawrh chhoh tawh thu leh Mizoram chhunga pangpar khawitu te pawhin chutiang dinhmun chu an thlen theih ve thu a sawi a, Sairang a relrawn luh hnu ah pheichuan rel hmanga pangpar Delhi-a thawn a nih tawh thu leh hei hian rah tha tak a chhuah ngei a beisei thu a sawi a, pangpar khawi chu tih takzet a kalpui a nih chuan Mizoram pawhin ram changkang zawkte a el phak thu a sawi bawk.

Mizoram Florists' Association hian a din tan, ni 16 November 1997 atang khan a remchan ang angin Flower Show leh Fair-te hlawhtling takin an lo buatsaih tawh thin a. Kumin MFA Winter Fair pawh hi December ni thum thleng awh tura ruahman niin, Fair atan hian Pangpar khawi bikah a vaiin 32 leh Potted Show ah pot 108 a lut a ni.

<><><>

ROAD SAFETY WEEK

Zoram Drivers' Union (ZDU) buatsaihin Road Safety Week vawi 44-na - Fimkhurna Hapta chu tukin khan Aizawl Sairang Road-a ZDU hmunpui-ah Transport Minister Pu Vanlalhlana'n a hawng.

Pu Vanlalhlana chuan Fimkhurna Hapta hawnaah hian thu sawiin, November ni 25 atanga December ni 1 thlenga Road Safety Week hman tur chu mipuite hnena fimkhurna thuchah leh mawhphurhna inhriattirna hun pawimawh tak a nih thu a sawi. Road Safety chuan Lirthei khalhtute chauh huam lovin, kawngpui hmangtu zawng zawngte a huam thu leh fimkhurna kawngah pawh mitinin mawh an phurh thu a sawi

bawk. Lirthei khalh laia rilru pek tawk lohte, hmanhmawh luat avanga vanduaina tawk leh nunna chante an awm thin chu pawl a tih thu a sawi a. Sawrkar chuan vantlang himna tura Dan a siamte chu mitinin ngai pawimawh zel turin he hunah hian a chah nghal bawk.

Tukin a Road Safety Week Aizawla hawna hun hi ZDU President Pu F. Dosanga'n a kaihruai a. Mizoram hmun hrangah a rualin Road Safety Week hawna hun hi hman a ni.

ZDU hmalakna hian Lirthei khalh chungchanga Fimkhurna Hapta hi kum 1981 atanga khan Drivers' Week tih hming pu-in hman tan a ni a. Kum 2007 atangin Road Safety Week tih a thlakin kumtin hman thin a ni.

<><><>

FISHERIES MINISTER

Fisheries Minister Pu Lalthansanga chuan, Mizoram chhunga sangha chaw harsatna puhruk nan 'bana kaih policy' hman tangkai a nih tur thu a sawi.

He thu hi vawiina Aizawl Ngaizel-a sangha vawn thatna tur cold storage hawna inkhawmah sawiin, Fisheries Minister chuan, Mizoram district hrang hrang a sangha khawi tute dinhmun chu chiang lehzuat a hriat a nih theihna atan, department hotuten a hmunah an kal chilh thlap tur thu a sawi a, chumi atang chuan sangha thar chhuah thahnem zawk neih theih dan tur leh man man zawk a hralh theih dan tur ruahman a nih tur thu a sawi bakah, sangha khawi tute chu Chief Minister special package atang pawh a nasa taka tanpui an nih tur thu a sawi bawk.

Vawiin Cold Storage hawna inkhawm hi Aizawl South II bialtu MLA, Pu Lalchhuanthanga'n a hmanpui a, a bial chhunga Fisheries Department in sangha hralhna kawnga hmasawna ruhrel tha tak an din chu lawmawm a tih thu a sawi.

He Cold Storage hi Special Assistance to States for Capital Expenditure (SASCE) 2020-2021 chhunga Integrated Fishery and Agro-based Processing Unit component, Horticulture Department Nodal-na hnuai din niin, he project atan hian cheng nuai 123 hmuh a ni a. He Cold storage ah hian cold chamber pahnih awmin, sangha 16 tonnes vel vawng tha thei tura ruahman a ni.

<><><>

WOMEN HELPLINE

Women and Child Development hnuai Women Helpline-te tarlan danin, kumin July atanga October thla thleng a hmeichhiate chung a hlei lenna thleng report an dawn chuan 11,864 a tling tawh.

Women Helpline-a thawkte'n Akashvani News Aizawl an hrilh danin nikum 2024 atanga kumin June thla thleng a hmeichhiate chung a hleilenna thleng report an dawn chuan 13,994 a hawlh kai a, kum 2016 atanga kuin thla hmasa thleng a hmeichhiate chung a hlei lenna thleng report an dawn chu a vai a chhiarin 45,532 a tlin thu an sawi bawk.

Women Helpline-a thawktute chuan hmeichhiate chung a hlei lenna thleng hi domestic leh non-domestic- ah then hrangin domestic bikah hian a vai a chhut a za a 56.14 a thleng a, non-domestic bikah hian za a 43.86 a awm bawk a ni. Kan corr report i lo ngaithla ang :

Women Helpline-a thawktuten hmeichhiate chung a hlei lenna thleng chungchanga case-an ziah luh zingah hian pasal nei lai tam berin hlei lenna tawk zinga za a 41 % chu pasal nei lai an ni a, kum 18 atanga 40 ten hlei lenna hi an tawk hnem ber a, za a 71% hlei lenna tawk zinga mi hi kum 18 atanga 40 inkar an ni.
John Vanlalchhuanga, Akashvani News, Aizawl.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

SIAHA SARDAR@150

Sardar Vallabhbhai Patel pian champha kum 150-na puala 'Mera Yuva Bharat (MY Bharat)' hnuai India ram inpumkhatna atana beihpui thlakna - "Sardar @150 Unity Campaign" hnuai Siahah kawng zawh niin, sawrkar mi leh zirna In paruk atangin zirlai -200, ten kawng an zawh.

Kawng zawh hawna hun hi Vaihpi field-ah neih niin kal khawm zawng zawng ten ' Atmanirbhar leh Nasha Mukta Bharat' pualin thu an tiam vek a ni. Khuallian Pu Vanlalchhuanliana, SDO (S) chuan kawngzawh tur te vailiamin, Siahah khawpui chung Vaihpi field atanga Government Higher Secondary School, New Siahah thlang kawng hi zawh a ni.

Government Higher Secondary School, New Siahah tualah kawng zawh kharna hun hman a ni a, Pu N. Zakhai, Adviser to CEM, MADC chu khuallian a ni. Khuallian chuan tuna zirlai duhawm tak takte chu nakin huna ram leh hnam tan a mi chhuanawm tak tak tur annih thu a sawi a. Khawvel hmasawna chak tak hian thil tha tam tak karah sualna a thlen fo a, a bik takin ruihhlo a hluar em em tiin, chumi laka inthiarfihlim nachang hre turin zirlai kalkhawmte a chah a ni.

<><><>

LUNGLEI PS AWARD

Kumin October thlaa Facebook-a Wildlife Dan bawhchhiatna video post chungchanga a titu chhui chhuahna kawngah Lunglei Police Station te'n rang taka hman an lak avangin Thenzawl Divisional Forest Officer leh Working Plan Officer (South) te tang kawp chuan vawin khan Lunglei P/S hnenah chawimawina thuziak leh pawisa fai an hlan.

He hun hi Lunglei Additional Superintendent of Police Pu K. Beihmotaosa chuan a hmanpui a. Chawimawina hi WPO (South) Pu Solai Azyu chuan Lunglei P/S Officer-in-Charge Inspector VL Sawma kutah hlanin, mipuite tan social media hman danah fimkhur tur leh ramngaw leh nungcha humhalhna dan te tha taka zawm turin a ngen nghal baw.

He paw khawihna thlenna hi Thenzawl Forest Division huam chung a ni a. Wildlife Dan bawhchhetute chet dan video social media-a tar lan an hmuh atangin Environment, Forests & Climate Change (EF&CC) Department hotute chuan hman la nghalin, an ngenna angin Lunglei Police te chuan paw khawihhute hi rang takin an chhui chhuak a. Paw khawihhute hi dan anga hrem an ni.

<><><>

SBMG CHAMPHAI

Swachh Bharat Mission Gramin SBM-G hnuai Siahah Champhai District chhunga chhungkaw 233 hnenah ek in sak tanpui na sem mek a ni.

District huam chhunga khaw 33 thlan bik te hnenah ek in sak tanpuina hi sem niin Khaw 28 ah ek in sak tanpuina hi sem zawh tawh a ni a, chhungkaw 190 ten tanpuina hi an dawng tawh.

Kar kalta ni 20 atang khan ek in sak tanpuina hi sem tan niin, November ni 27 hian tanpuina bungrua te hi sem zo thei tura ruahmanna siam a ni. Ek in sak tanpuina ah hian commode, commode pipe leh rangva te sem a ni. SBM-G hnuai hian Individual Household Latrine (IHHL) hi kum tin sem thin a ni.

<><><>

PM MODI

Prime Minister Narendra Modia chuan vawin khan Shri Ram Janmbhoomi Temple Ayodhya ah dharma dhawja flag a pawtparh. Vawina Prime Minister hun hman hi temple sak zawh pual niin ram inpumkhatna leh hnam ziarang hmasawna kawng khat entirna a ni. Thusawin PM Modia chuan vawina puanzar an pawtparh chuan ramchhunga thiamna leh kawng tinrenga hartharhna renaissance a entir a ti a. He flag thianglim hi kumkhua in diklona laka dikna a dinchan zel zia entirtu a ni ang a ti baw.

<><><>

LABOUR CODE

Labour Code thar chuan ramchhung eibar zawinnaah hna thar nuai 77 chuang a siam belh dawn niin SBI chuan a sawi. SBI report hnukung bera tarlan anih danin labour code thar hian ram sum dinhmun a tihmasawn bakah hna nei lo zat a ti tlem dawn a. Ramchhunga hna nei lo zat hi zaa 1.3 lain a tihnam dawn niin SBI report chuan a tarlang a. Heti zata hna nei lo an kiam chuan hna thar nuai 77 chuang siambelh a ni dawn tihna a nih thu a tarlang bawk a ni.

<><><>

IFFI

Vawiin khan International Film Festival of India (IFFI) vawi 56 naah nimina Bollywood actor hranglui thi ta Dharmendra sunna hun hman a ni a. He hunah hian film siamtu hmingthang Rahul Rawail chuan Dharmendra nena hun an hman hrang hrangte a tarlang a ni.

Vawiin vek khan Russian movie "Transparents Land" chu a vawi khat nan chhuah a ni. He film hi Dmitry Davydov direct niin producer hi Maksim Dobromyslov a ni a. He film hian chhuah anih hian lawm a hlawh hle nia thudawn a ni.

<><><>